



Informativni bilten Općine Novo Sarajevo

NS-OB-106

PREZIME (ime jednog roditelja) IME _____

ADRESA STANOVANJA _____

TELEFON _____

PRIJAVNI LIST
za razgovor sa načelnikom

Tema razgovora: (opširno navesti)



IZDVAJAMO:

- **Općina Novo Sarajevo izvršila korekcije na ukupno 89 obrazaca u cilju uvažavanja jednoroditeljskih zajednica**
- **Predstavljen projekat uspostave "Edukativnog Green Centra" u okviru bivšeg vrtića "Ciciban"**
- **Omladinska banka Novo Sarajevo podržala pet projekata i jedan mikrobiznis u okviru prvog poziva za mlade 2021. godine**

Informativni bilten Općine Novo Sarajevo

NAKON DUŽEG VREMENA 6. SJEDNICA OPĆINSKOG VIJEĆA NOVO SARAJEVO ODRŽANA U PROSTORIJAMA MEĐUNARODNOG CENTRA ZA DJECU I OMLADINU



Nakon što su se zbog pandemije koronavirusa sjednice Općinskog vijeća duže vremena održavale putem on-line platforme, 29. juna ove godine zahvaljujući poboljšanju epidemiološke situacije stekli su se uslovi da se 6. sjednica Općinskog vijeća Novo Sarajevo održi u zgradi Međunarodnog centra za djecu i omladinu Novo Sarajevo uz prisustvo 31 vijećnika.

Vijećnici su na sjednici razmatrali i usvojili Odluku o osnivanju Etičke komisije i Odluku o izmjeni Odluke o osnivanju Komisije za ljudska prava, slobode i ravnopravnost.

Nakon duže rasprave usvojen je zaključak sa dopunama o ne usvajanju Godišnjeg izvještaja o izvršenju budžeta Općine Novo Sarajevo za 2020. godinu – Završni račun.

Pred kraj sjednice vijećnicima je podnesena informacija o ostvarivanju prava korisnika ličnih i porodičnih invalidnina, ratnih vojnih invalida 100% I grupe (paraplegičara) – korisnika tuđe njege i pomoći, na području općine Novo Sarajevo za 2020. godinu.

OPĆINA NOVO SARAJEVO IZVRŠILA KOREKCIJE NA UKUPNO 89 OBRAZACA U CILJU UVAŽAVANJA JEDNORODITELJSKIH ZAJEDNICA

Općina Novo Sarajevo odazvala se odmah pozivu Udruženja “Zaboravljena djeca rata”, te je uspješno i prije predviđenog roka završila proces izmjene svih općinskih obrazaca sa ciljem uvažavanja jednoroditeljske zajednice i poštivanja uloga samohranih majki u društvenim zajednicama.

S tim u vezi, izvršene su korekcije na ukupno 89 obrazaca Općine Novo Sarajevo na kojima je ostavljena mogućnost da se prilikom podnošenja zahtjeva navede “*ime jednog roditelja*”, umjesto „*ime oca*“.

Korekcije su izvršene u sljedećim službama: Služba za poslove Kabineta Općinskog načelnika; Služba za privredu, budžet i finansije; Služba za opću upravu; Služba za imovinsko-pravne i geodetske poslove i katastar nekretnina; Služba za boračko-invalidsku zaštitu; Služba za socijalna pitanja, zdravstvo, izbjeglice i raseljena lica; Služba za obrazovanje, kulturu i sport.

Ovo je mali doprinos u pružanju podrške djeci koja su nastala posljedicom rata, a koja su ravnopravni članovi našeg društva i zajednice.

NS-OB-106

PREZIME (*ime jednog roditelja*) IME _____

ADRESA STANOVANJA _____

TELEFON _____

PRIJAVNI LIST za razgovor sa načelnikom

Tema razgovora: (opširno navesti)

NAPOMENA : Popunjen prijavni list predati u pisarnicu

Potpis _____ Sarajevo, _____

Početak primjene: 18.06.2021. godine

Informativni bilten Općine Novo Sarajevo

OMLADINSKA BANKA NOVO SARAJEVO PODRŽALA PET PROJEKATA I JEDAN MIKROBIZNIS U OKVIRU PRVOG POZIVA ZA MLADE 2021. GODINE



U prostorijama Međunarodnog centra za djecu i omladinu Novo Sarajevo, 25. juna ove godine upriličeno je potpisivanje ugovora sa timovima odobrenih projekata i predstavnikom odobrenog mikrobiznisa iz Prvog poziva za Mlade 2021, kojeg je Omladinska banka Novo Sarajevo raspisala 15.04.2021. godine. U Prvom pozivu za Mlade 2021 odobreno je ukupno pet projekata i jedan mikrobiznis.

U međuvremenu, Omladinska Banka Novo Sarajevo je 10. juna ove godine raspisala i Drugi poziv za Mlade 2021, koji ostaje otvoren do 28. juna.

Potpisivanju ugovora prisustvovali su predstavnici Fondacije Mozaik, članovi Odbora Omladinske banke Novo Sarajevo, te predstavnici Općine Novo Sarajevo.

Općina Novo Sarajevo i Fondacija Mozaik potpisali su Memorandum o saradnji na razvoju programa Omladinska banka Novo Sarajevo uključujući i podršku mikrobiznisima mladih. Program Omladinske banke omogućava mladima da prepoznaju društvene probleme u svojim zajednicama i rješavaju ih kroz društvene projekte. Članovi i članice Omladinske banke imaju ulogu da podstiču aktivizam mladih i odlučuju o podršci projektima neformalnih grupa mladih. Neformalne grupe mladih realizuju projekte na teritoriji Općine uz monitoring i podršku Omladinske banke, Općine i Mozaika. Članovi i članice Omladinske banke podstiču poduzetništvo mladih i donose i odluku o podršci mikrobiznisima mladih.

Zajednički fond koji planiraju Općina Novo Sarajevo i Fondacija Mozaik u četverogodišnjem periodu (2021-2024) iznosi 144.000 KM, od čega Općina Novo Sarajevo učestvuje sa 68.000 KM.

POČELA OBUKA ZA BUDUĆE PREDUZETNIKE SA PODRUČJA OPĆINE NOVO SARAJEVO

Budućim preduzetnicima sa područja Općine Novo Sarajevo obuka će omogućiti da se kroz intenzivno učenje i sticanje znanja i vještina osposobe za pokretanje vlastitog biznisa.

Preduzetničkom obukom koje je počela 11.06.2021. godine u JU Međunarodni centar za djecu i omladinu biće obuhvaćeno minimalno 25 učesnika sa područja Općine Novo Sarajevo uz stručnu, mentorsku i bespovratnu finansijsku podršku po 5.000,00 KM za 5 najboljih poslovnih poduhvata sa područja Općine.

Naime, Općina Novo Sarajevo je 05.05.2021. potpisala Ugovor o partnerstvu sa Investicijskom fondacijom IMPAKT, s ciljem podrške preduzetništvu i razvoju preduzetničkog okruženja na teritoriji Općine.

Investicijska fondacija IMPAKT Sarajevo i Projekat zapošljavanja mladih (YEP), koji se realizira uz podršku Vlade Švicarske, a koji su u periodu 2018-2020. godina u saradnji sa preko 40 lokalnih zajednica i javnih službi za zapošljavanje u BiH realizirali YEP inkubator poslovnih ideja u kojem je podržano osnivanje preko 200 novih poslovnih poduhvata širom BiH, nastavljaju realizaciju aktivnosti koje se odnose na podršku razvoju preduzetništva i očuvanju radnih mjesta preduzetnika i malih preduzeća.

Informativni bilten Općine Novo Sarajevo

OPĆINA NOVO SARAJEVO VODEĆI PARTNER U PROJEKTU „PODRŠKA USPOSTAVLJANJU I UNAPREĐENJU MEHANIZAMA ZA PODRŠKU SAMOZAPOŠLJAVANJU KROZ SARADNJU INOVATIVNIH LOKALNIH ZAJEDNICA I NOVIH PREDUZEĆA U PREKOGRANIČNOM PODRUČJU – SYSTEM”

Projekat “Podrška uspostavljanju i unapređenju mehanizama za podršku samozapošljavanju kroz saradnju inovativnih lokalnih zajednica i novih preduzeća u prekograničnom području – SYSTEM” realizuje se u okviru Instrumenta za pretpristupnu pomoć (IPA II)-Programa prekogranične saradnje Srbija – Bosna i Hercegovina 2014-2020.

Općina Novo Sarajevo je u maju ove godine potpisala Ugovor o sufinansiranju projekta sredstvima Evropske unije sa nadležnim tijelom za ugovaranje – Sektor za ugovaranje i finansiranje programa iz sredstava EU (CFCU) u okviru Ministarstva finansija Republike Srbije.

Projekat realizuju Općina Novo Sarajevo u partnerstvu sa Općinom Ilijaš i Krovnom organizacijom mladih Srbije (KOMS), kao i sa opštinama Sremska Mitrovica i Loznica, koje imaju ulogu pridruženih partnera. Ukupna vrijednost projekta je 152.294,97 EUR, od čega Evropska unija sufinansira 123.167,97 EUR (80,87%), a preostalih 29.127,00 EUR (19,13%) obezbjeđuju partneri na projektu.

Načelnik Općine Novo Sarajevo dr. Hasan Tanović istakao je da Općina Novo Sarajevo implementacijom ovog projekta želi poslati jasnu poruku otvorenog i poželjnog partnera za saradnju.

– Ovaj projekat je u skladu sa strateškim ciljevima razvoja Općine i rezultat je pojačanih aktivnosti i opredjeljenja lokalne administracije za kreiranjem i korištenjem dostupnih finansijskih sredstava iz EU fondova, kao i uspostavom dugotrajne saradnje sa lokalnim zajednicama na regionalnom nivou, istakao je načelnik Tanović.

Cilj projekta je povećanje prilika za zapošljavanje kroz zajedničke aktivnosti na razvoju novih mehanizama za podršku samozapošljavanju, kroz primjenu novih metodologija u prekograničnom području BiH i Srbije, kroz primjenu zajedničkih programa, obrazovanje, prenos znanja, kao i aktivnosti na podizanju svijesti o značaju predzetništva .

Općina Novo Sarajevo u ovom projektu je vodeći partner i zajedno sa ostalim partnerima kreirala je projektni prijedlog koji je odobren i koji će zajednički implementirati naredna 24 mjeseca, istakla je Azra Prašović, projekt menadžer ispred Općine Novo Sarajevo, te dodala da Općina ulaže velike napore u realizaciji svojih strateških ciljeva i korištenju dostupnih prilika za apliciranje i korištenje sredstava iz EU fondova.

NAČELNICI OPĆINA KANTONA SARAJEVO TRAŽE ZAŠTITU PRAVA NA LOKALNU SAMOUPRAVU

U zgradi Općine Novi Grad Sarajevo u srijedu, 16. juna ove godine održan je sastanak načelnika općina s područja Kantona Sarajevo na kojem je razgovarano o Zakonu o prostornom uređenju Kantona Sarajevo. Pomenuti zakon donesen je 2017. godine, a kojim je preuzeto puno nadležnosti iz Zakona o principima o lokalnoj samoupravi datih općinama i preneseno na kantonalni nivo koji je neefikasan, zbog čega je otežan rad lokalnih zajednica, a posebno sa aspekta izdavanja raznih saglasnosti i odobrenja za građenje.

Sastanku su prisustvovali načelnici općina Novi Grad, Stari Grad, Ilidža, Hadžići, Ilijaš i Trnovo, Semir Efendić, Ibrahim Hadžibajrić, Nermin Muzur, Hamdo Ejubović, Akif Fazlić i Ibro Berilo, te pomoćnica načelnika Općine Centar za urbanizam Amela Landžo, Arijana Talović, pomoćnica načelnika Općine Novo Sarajevo za poslove Općinskog vijeća i lokalne samouprave i Selma Fišek, predstavnica Saveza općina i gradova FBiH.

Istaknuto je da je Bosna i Hercegovina među najsporijim državama na svijetu, zbog zakona koji su neusaglašeni i neprovodivi, a ne donose ih općine, nego institucije kantona, Federacije BiH i države BiH.

„Primjetili smo da je Zakon o prostornom uređenju KS u neskladu sa Zakonom o principima o lokalnoj samoupravi u FBiH, a isto tako je u suprotnosti i sa Evropskom poveljom o lokalnoj samoupravi, i samim tim danas smo se usaglasili da načelnici svih devet općina potpišu apelaciju prema Ustavnom sudu, da se takav Zakon stavi van snage. Paralelno sa tim ćemo obavijestiti Vladu FBiH da smo podnijeli apelaciju na Ustavni sud i predložiti ćemo im da ovakav Zakon zajedno sa općinama izmjene i prije presude, na način da on bude ustavan i da bude u saglasnosti sa Evropskom poveljom o lokalnoj samoupravi i da bude provodiv na jednostavan i brz način, a ne kao što je sada, da otežava rad lokalnih zajednica“, izjavio je Hamdo Ejubović, načelnik Općine Hadžići i predsjednik Saveza općina i gradova FBiH.

Informativni bilten Općine Novo Sarajevo

Na sastanku je usaglašeno i da se Vladi Kantona Sarajevo, premijeru i ministru prostornog uređenja što prije uputi obavijest o tome da svih devet načelnika pokreće inicijativu i apelaciju prema Ustavnom sudu za zaštitu prava na lokalnu samoupravu, kao i zahtjev da se pokrene procedura za donošenje novog ili izmjenu i dopunu postojećeg Zakona o prostornom uređenju, u koju će biti uključene sve općine sarajevskog kantona i ispoštovani principi iz Evropske povelje o lokalnoj samoupravi, te Federalni zakon o principima lokalne samouprave.

Između ostalog, dogovoreno je da se u narednom periodu održi press konferencija na kojoj će načelnici općina KS javnost upoznati o svim problemima sa kojima se suočavaju lokalne zajednice, a koje uzrokuju zakoni koji nisu usklađeni sa Zakonom o principima lokalne samouprave i Poveljom o lokalnoj samoupravi, te uputiti zahtjeve da ih promjene oni koji su ih donijeli.

GRADONAČELNICA SARAJEVA I NAČELNICI OPĆINA NOVO SARAJEVO I CENTAR O UREĐENJU I REKONSTRUKCIJI SPOMEN PARKA VRACA

“U vrijeme kad većina govori o onome po čemu se razlikujemo, mi govorimo i ulažemo u ono što nam je zajedničko. Spomen park Vraca je dio naše historije koji treba biti sačuvan i ostaviti trag budućim generacijama”, kazala je gradonačelnica Sarajeva Benjamina Karić prilikom današnjeg obilaska ovog lokaliteta sa načelnicima Općine Centar i Novo Sarajevo, Srđanom Mandićem i Hasanom Tanovićem.



Grad Sarajevo pokrenuo je inicijativu uređenja i čišćenja, a gradonačelnica Karić najavila je da će nakon pribavljanja potrebnih saglasnosti, predložiti Gradskom vijeću da se ovaj spomen park – muzej na otvorenom, neprocjenjive vrijednosti, pridruži JU Muzeji Grada:

“Kompleks na Vracama ima svoju simboliku, ljepotu i važnost, te je krajnje vrijeme da oživimo jedan od najvećih simbola otpora i borbe građana protiv fašizma. Zajedno sa uvaženim načelnicima Mandićem i Tanovićem ćemo pokrenuti rekonstrukciju i novim generacijama pokazati za šta su se borili njihovi preci”, ističe Karić uz zahvalnost KJKP “Park” koji su odmah iskazali spremnost da učestvuju u projektu.



Načelnik Srđan Mandić pozdravlja inicijativu Grada koji treba da bude titular i upravlja parkom kao stalni nadzor:

“Na ovaj spomenik i dio historije pala je sjena zaborava u mandatu prethodne vlasti. Kao tadašnji ministar komunalne privrede i infrastrukture, sa timom “Parka” i “Rada” smo napravili akciju čišćenja, upalili vatru nakon 27 godina. To vam dovoljno govori koliko mi je i danas na funkciji načelnika važan ovaj projekat. Gradonačelnica može računati na općinu Centar”, riječi su Mandića koji je uvjeren da će zajedničkim snagama ovaj prostor učiniti novom turističkom atrakcijom Sarajeva.

“Općina je do sada uložila mnogo sredstava pripremajući park za prigodne manifestacije i praznike i samostalno smo izlazili u takve akcije. Sada smo na dobrom putu da Grad preuzme ingerencije. Simbol borbe protiv fašizma i kulturu sjećanja moramo principijelno njegovati”, kazao je Hasan Tanović, načelnik Općine Novo Sarajevo na čijem se području kompleks Vraca i nalazi. Novoizabrani vršilac dužnosti direktora Kantonalnog javnog komunalnog preduzeća “Park” Adis Bešlić najavio je košnju cijelog lokaliteta od 60.000 kvadratnih metara i redovno održavanje higijene prostora, te zahvalio gradonačelnici i načelnicima na brznoj reakciji.

Informativni bilten Općine Novo Sarajevo

U TOKU RADOVI NA REKONSTRUKCIJI JAVNE RASVJETE NA VILSONOVOM ŠETALIŠTU – I FAZA



Na Vilsonovom šetalištu u toku je izvođenje I faza radova na rekonstrukciji javne rasvjete koja obuhvata ugradnju 148 ambijentalnih svjetiljki tipa “fenjer” na postojeće stubove javne rasvjete i 43 svjetiljke za cestovnu rasvjetu koje se postavljaju na sajlju.

Radi se o projektu modernizacije javne rasvjete u Vilsonovom šetalištu i to na dionici od mosta Topal Osman – paše do Mosta Suade Dilberović i Olge Šučić, koji će se realizirati u dvije faze.

Sve svjetiljke će sadržavati LED module u skladu sa potrebnim standardima za klase saobraćajnice i šetalište, te u skladu sa preporukama Pravilnika o tehničkim uslovima sistema javne rasvjete Kantona Sarajevo. U II fazi radova predviđena je mogućnost daljinskog upravljanja i dimovanje,

tzv. pametna javna rasvjeta, čime će se na ovom lokalitetu ostvariti više od 60 posto uštede električne energije, što je ujedno i primarni cilj realizacije ovog projekta.

S obzirom da se radi o dionici koja jednim dijelom obuhvata i područje Općine Centar, Općina Novo Sarajevo je pribavila saglasnost Općine Centar za učešće u projektu rekonstrukcije i unaprjeđenja sistema javne rasvjete u Vilsonovom šetalištu na dionici koja se nalazi na teritoriji ove Općine.

Na predmetnoj dionici postoji ukupno 148 stubova javne rasvjete, od čega na području Općine Novo Sarajevo 112, a na području Općine Centar 36.

Izvođač radova je firma “SES” d.o.o. Sarajevo, a nadzor nad radovima obavlja Zavod za izgradnju Kantona Sarajevo.

RADOVI NA SANACIJI PJEŠAČKE STAZE U ULICI ZMAJA OD BOSNE U ZAVRŠNOJ FAZI

Radovi na sanaciji pješačke staze u ulici Zmaja od Bosne u završnoj su fazi. Na ovoj dionici prethodno su okonačni radovi na sanaciji vodovodne mreže i izgradnji biciklističke staze.

Rekonstrukciju vodovodne mreže izvodila je firma “Mibral” na osnovu ugovora sa KJKP “Vodovod i Kanalizacija”, dok je radove na izgradnji biciklističke staze finansirao Grad Sarajevo kroz ugovor sa firmom “BOSMAN”.

Nakon niza sastanaka održanih sa predstavnicima KJKP “Vodovod i Kanalizacija” postignut je dogovor da Općina Novo Sarajevo bude investitor sanacije pješačke staze u punom profilu na dionici na kojoj su prethodno završeni radovi na sanaciji vodovodne mreže. Izvođač radova je firma “Sarajevoputevi”.



Informativni bilten Općine Novo Sarajevo

ZAVRŠNI RADOVI NA SANACIJI ULICE KUPREŠKA



Nakon što je završena rekonstrukcija vodovodne mreže u dužini od 170 metara i izgradnja kućnih priključaka vode na novu mrežu izvedeni su radovi na ugradnji asfaltnog zastora na kolovoznoj konstrukciji u ulici Kupreška.

Tokom sanacije u toj ulici uklonjeni su ostatci asfaltnog zastora, zamijenjeni su oštećeni ivičnjaci, očišćeni postojeći slivnici i šahtovi odvodnje i urađena nivelacija. Paralelno sa navedenim radovima izvršeno je polaganje instalacija BH TELECOM-a čime će se spriječiti naknadno prokopavanje saobraćajnice. Sanirani su i svi prokopi, a nakon okončanja radova na rekonstrukciji vodovodne i telekomunikacijske mreže.

Na osnovu ugovora na tekućem održavanju saobraćajnica i pješačkih staza na području Općine Novo Sarajevo za 2021. godinu, izvođač navedenih radova je firma "SARAJEVOPUTEVI".

NASTAVLJENI RADOVI NA SANACIJI GLAVNE SAOBRAĆAJNICE U ULICI HUMSKA

Na području naselja Pofalići nastavljene su radovi na rehabilitaciji lokalne ceste u ulici Humska. U proteklom periodu završeni su radovi na dionici dužine oko 900 metara, a trenutno se izvode radovi na preostalim 600 metara saobraćajnice.

Izvođač radova je firma "BOSMAN" d.o.o. Sarajevo, a navedeni projekat zajedničkim sredstvima u iznosu od oko 451.000 KM finansiraju Direkcija za puteve Kantona Sarajevo i Općina Novo Sarajevo.

Nadzor nad izvođenjem radova ugovoren je od strane Direkcije za puteve Kantona Sarajevo i vrši ga "IPSA" Institut.



U TOKU RADOVI NA ASFALTIRANJU PRVE DIONICE U ULICI NOVOPAZARSKA U DUŽINI OD 350 METARA



Na području novosarajevskih mjesnih zajednica Vraca i Hrasno brdo u ulici Novopazarska u toku su radovi na asfaltiranju kolovoza na prvoj dionici dužine oko 350 metra.

Ovim radovima ozvaničen je početak realizacije projekta sanacije saobraćajnice u dužini oko 1300 metara, ulice Novopazarska od spoja sa ulicom Dobojska do neposredno iza raskrsnice sa ulicom Posavska. Izvođač radova je KJKP „Rad“, a vrijednost kompletnog projekta je oko 618.500,00KM.

Radove na terenu u petak, 04. juna ove godine obišli su načelnik Općina Novo Sarajevo dr. Hasan Tanović sa direktoricom KJKP „Rad“ Verom Arnautović i saradnicima.

Pomenuti radovi podrazumijevaju sanaciju tamponskog sloja, zamjenu nosivog asfaltnog sloja i nivelaciju postojećih slivnika, šahtova, te vodomjernih poklopaca.

Nakon asfaltiranja prve dionice, kreće se sa radovima na slijedećem obuhvatu. Izvođenjem radova na manjim dionicama omogućeno je funkcionisanje saobraćaja uz minimalne smetnje.

ZAVRŠNI RADOVI NA SANACIJI PARKING PROSTORU U ULICI TOPAL OSMAN PAŠE KOD BROJEVA 12 I 14

Ugradnjom asfaltnog zastora završava se predviđena sanacija i zamjena kolovozne konstrukcije na parking prostoru u ulici Topal Osman Paše kod brojeva 12 i 14 na području mjesne zajednice “Trg heroja”.

Tokom izvođenja radova izvršeno je uklanjanje postojećeg asfaltnog sloja sa zamjenom tamponskog sloja ne mjestima većih oštećenja kolovoza, kao i zamjena oštećenih ivičnjaka, nivelacija asfaltnih površina sa rješavanjem odvodnje parking prostora.

Sanacija ovog parking prostora realizirana je na osnovu zahtjeva Savjeta mjesne zajednice, kao i potpisanog Ugovora na poslovima tekućeg održavanja saobraćajnica na području Općine Novo Sarajevo. Izvođač radova je firma “Sarajevoputevi” d.d. Sarajevo.



NAKON REKONSTRUKCIJE VODOVODNE MREŽE OKONČANO ASFALTIRANJE SAOBRAĆAJNICE U ULICI HUMSKA OD BROJA 160 DO BROJA 174

Nakon završenih radova na rekonstrukciji vodovodne mreže u ulici Humska od broja 160 do broja 174, radnici KJKP „Rad“ okončali su radove na sanaciji prokopa i ugradnji završnog sloja asfalta na ovom lokalitetu.

Radovi su obuhvatili sanaciju i poboljšane kanalizacione mreže, ugradnju novih ivičnjaka, pripremi podloge, te ugradnja asfaltnih slojeva.



Informativni bilten Općine Novo Sarajevo

POVODOM 7. GODIŠNJICE RADA SERVIS CENTRA „DAJTE NAM ŠANSU“ PREDSTAVLJEN PROJEKAT USPOSTAVE „EDUKATIVNOG GREEN CENTRA“ U OKVIRU BIVŠEG VRTIĆA „CICIBAN“



U organizaciji Udruženja „Dajte nam šansu“ u utorak, 8. juna ove godine održano je svečano obilježavanje 7. godišnjice Servis centra za porodice djece/osoba s poteškoćama u razvoju „Dajte nam šansu“.

Radi se o servis centru gdje porodice sa prebivalištem na području Kantona Sarajevo koje imaju člana sa poteškoćama u razvoju – bez obzira na medicinsku dijagnozu, dob i stepen invaliditeta mogu besplatno koristiti usluge koje profesionalno osoblje i volonteri Udruženja pružaju.

Ovom prilikom, predsjednica Udruženja „Dajte nam šansu“ Ines Kavalac predstavila je novi projekat buduće uspostave „Edukativnog Green centra“ koji će se implementirati uz podršku USAID BiH, Vlade KS i Općine Novo Sarajevo, a koji će biti smješten u prostorijama bivšeg novosarajevskog vrtića „Ciciban“.

Udruženje je prepoznalo devastirani objekat vrtića „Ciciban“ na području Općine Novo Sarajevo kao najadekvatniji za uspostavu jednog ovakvog centra, nakon čega je Općina odmah uputila inicijativu JU „Djeca Sarajeva“, premijeru Kantona Sarajevo i resornom kantonalnom ministarstvu da se ovaj objekat vrtića stavi na raspolaganje Udruženju „Dajte nam šansu“, a da će Općina Novo Sarajevo dati punu podršku za provođenje daljih aktivnosti na realizaciji ovog projekta.

Na manifestaciji su se, pored direktorice Udruženja „Dajte nam šansu“ Ines Kavalec, obratili i premijer Kantona Sarajevo Edin Forto, ministrica za odgoj i obrazovanje Kantona Sarajevo Naida Hota-Muminović, direktorica misije USAID-a za BiH Nansy J. Eslick, te načelnik Općine Novo Sarajevo dr. Hasan Tanović.

U svom obraćanju, Općinski načelnik dr. Tanović uputio je iskrene čestitke Udruženju „Dajte nam šansu“ na uspješnom kontinuiranom radu Servis centra, ali i zalaganju, trudu i radu svih volontera, roditelja- članova Udruženja u stvaranju boljih društvenih okolnosti za ugodniji život svojih porodica i svoje djece.

– Problematika sa kojom se svakodnevno susreću porodice djece s poteškoćama u razvoju treba da bude svima nama prioritet u našem djelovanju, posebno sa aspekta stvaranja mogućnosti za pristup sistemskom rješavanju njihovih problema uvažavajući njihovo dostojanstvo, različitosti i mogućnosti. Jedna od mojih prvih mojih zvaničnih posjeta po preuzimanju dužnosti načelnika Općine Novo Sarajevo bila je posjeta Servis centru „Dajte nam šansu“ i upoznavanje sa radom i aktivnostima centra, a sada već mogu reći da sam ponosan što smo dio ove jedinstvene priče uspostave Edukativnog centra. Raduje me što se kontinuirano provode aktivnosti i ulažu naponi svih nas zajedno da se ovaj projekat realizira, jer će „Edukativni Green Centar“ biti prvi ove vrste, ne samo na području Kantona Sarajevo, Bosne i Hercegovine, nego i Balkana, istakao je načelnik dr. Tanović.

Pred kraj zvaničnog dijela manifestacije predstavnici Udruženja „Dajte nam šansu“, premijer Kantona Sarajevo Edin Forto, ministrica za odgoj i obrazovanje KS Naida Hota-Muminović i načelnik dr. Hasan Tanović posadili su drvo ispred objekta budućeg Edukativnog Green centra, a bivšeg vrtića „Ciciban“.

Informativni bilten Općine Novo Sarajevo

OPĆINA NOVO SARAJEVO PODRŽALA NASTAVAK UREĐENJA MEMORIJALNE „BIJELE SOBE“ U ZNAK SJEĆANJA NA 1.600 UBIJENE DJECE OPKOLJENOG SARAJEVA

Predstavnici Udruženja roditelja ubijene djece opkoljenog Sarajeva 1992. – 1995. posjetili su Općinu Novo Sarajevo, te tom prilikom Općinskog načelnika dr. Hasana Tanovića upoznali o nastavku realizacije projekta izgradnje Memorijalne „Bijele sobe”, posvećene sjećanju na djecu ubijenu tokom opsade Sarajeva, a čiji se prostor nalazi u ulici Džidžikovac broj 3, u neposrednoj blizini Spomen-obilježja ubijenoj djeci opkoljenog Sarajeva 1992.-1995. godine.

Nakon što su u prethodnom periodu finansijske podrške ovom projektu pružili sarajevske općine Centar i Novi Grad, te Gradska uprava, važnost ovog projekta prepoznao je i načelnik dr. Tanović, te je Općina Novo Sarajevo obezbijedila iznos od 10.000 KM za obnovu i opremanje spomen-sobe.

Kako je pojasnio predsjednik Udruženja Fikret Grabovica ova spomen-soba imat će poseban historijski i edukativni značaj posebno za učenike iz osnovnih i srednjih škola koja će ovdje moći dobiti saznanja šta se dešavalo tokom agresije na državu Bosnu i Hercegovinu i opsadu Sarajeva, na koji način su ubijana nevina djeca na ulicama ovog grada, tokom igre, u dvorištima, u školskim učionicama, u redu za vodu i hljeb.

Realizacijom ovog projekta sačuvat će se sjećanje na 1.425 dana opsade, 1.601 nevino ubijeno dijete, 12.000 ubijenih civila i građana opkoljenog Sarajeva.

U utorak, 8. juna ove godine očekuje se i konačna drugostepena presuda Haškog tribunala ratnom zločincu Ratku Mladiću, bivšem komandantu Generalštaba Vojske Republike Srpske.

Tim povodom, predsjednik Udruženja roditelja ubijene djece opkoljenog Sarajeva 1992. – 1995. Fikret Grabovica poručio je da se nada da će se uvažiti žalba Tužilaštva i da će Mladić biti osuđen za genocid u Prijedoru i drugim bosanskim gradovima, ali i da je vrlo značajno da bude potvrđena optužnica i za teroriziranje i zločine tokom opsade grada Sarajeva, posebno zbog zločina nad djecom Sarajeva.

Rukopis onih koji su slijedili zločinačku doktrinu kako Mladića, tako i ostalih presuđenih i nepresuđenih ratnih zločinaca, ostaće zauvijek uklesan u nama koji živimo. Dužnost nam je da osiguramo da ih i historija pamti i opominje na njihova zlodjela, zauvijek.

ISPLATA JEDNOKRATNIH NOVČANIH POMOĆI NAJUGROŽENIJIM PENZIONERIMA SA PODRUČJA OPĆINE NOVO SARAJEVO

Isplata penzija za mjesec maj započinje u subotu 5. juna 2021. godine, a uz nju će penzioneri sa najnižim penzijama sa područja Općine Novo Sarajevo dobiti i jednokratnu novčanu pomoć u iznosu od 50 KM. Općina Novo Sarajevo obezbijedila je ovu pomoć za 5.328 penzionera prema evidenciji Federalnog zavoda za PIO/MIO, korisnika najniže penzije koju utvrđuje Zavod i koja iznosi 382,18 KM.

Osiguravši za ove namjene iznos od 270.000,00 KM u općinskom Budžetu za ovu godinu, Općina Novo Sarajevo pokazala je i na ovaj način brigu o penzionerima, kao posebno ugroženoj kategoriji stanovnika. Općina Novo Sarajevo ima 15.000 penzionera, a njih više od 35% su korisnici najniže penzije.

OBILJEŽENA 29. GODIŠNJICA BITKE NA HRASNOM BRDU I OSLOBAĐANJA PROSTORA ŽUČI



U povodu obilježavanja 29. godišnjice bitke za oslobađanja prostora Žuči, Krstca, Arnautke, Volujaka, Pajdaka i kote Orlić 876, kao i bitke na Hrasnom brdu položeno je cvijeće i odata počast na mezarjima i grobljima na području Općine Novo Sarajevo i Kantona Sarajevo.

Obilježavanju su prisustvovali načelnik Općine Novo Sarajevo dr. Hasan Tanović, predsjedavajući Općinskog vijeća Novo Sarajevo Robert Pleše i općinski vijećnici, predstavnici boračkih udruženja, porodice šehida i poginulih boraca, kao i građani.

Na današnji dan 1992. godine, u odbrani naselja Hrasno brdo, poginuo je Vinko Šamarlić.



U znak sjećanja na tog vrhunskog sportistu, patriotu i heroja odbrane Sarajeva, delegacija Općine Novo Sarajevo položila je cvijeće na grob Vinka Šamarlića na groblju Lav, kao i na Spomen ploči u naselju Hrasno brdo. Šamarlić je posthumno odlikovan "Zlatnom policijskom zvijezdom", "Medaljom za hrabrost" i "Ordenom zlatnog grba sa mačevima".

Ovaj značajan historijski datum obilježen je odavanjem počasti na šehidskom mezarju Kovači, mezarju prvog predsjednika RBiH i vrhovnog komandanta ARBiH Alije Izetbegovića, haremu Alipašine džamije, groblju Lav, mezarju Stadion, Šehidskom mezarju Buća potok, Spomen obilježju u Hrasnom, kao i na Orliću.



Prije 29. godina, dok su vođene su borbe na Hrasnom brdu, borci 1. i 3. odreda 13. Pofaličko-velešićke brigade u sadejstvu sa borcima OpŠTO Vogošća i OpŠTO Novi Grad, oslobodili su Krstac, Arnautku, Volujak, Pajdake i prostore Žuči do najdominantnije kote Orlić tt 876.

U borbama na Hrasnom brdu svoje živote dala su 22 šehida i poginula borca: Enes Lakota, Mladen Jević, Amir Muhović, Safet Gerin, Džemal Gerin, Izet Čomor, Alija Jažić, Admir Džubur, Mehmed Mešanović, Vehid Grbo, Hamdija Trešnjo, Ismet Majstorić, Salih Žiga, Sakib Pecikoza, Dževad Kulović, Mirsad Isaković, Demo Korać, Aleksandar Božin, Vinko Šamarlić, Džemal Panjeta, Valentin Ševerdija i Hamed Papaj.

U oslobađanju prostora Žuči poginuli su: Munib Tucak, Zijad Heljo, Elmedin Vražalica, Nihad Tihčić, Safet Tahirović, Nedžad Pindžo, Senad Pohara, Medin Ramović, Mustafa Salispahić, Senad Škoro, Hašim Krako, Ermin Imamović, Vehbija Hadžić, Haris Fatić, Šaćir Demirović, Haris Čampara i Semir Kadić. Nedaleko od kote 850 na prostoru Žuči, 9. juna 1992. godine, nestao je Kasim Gološ koji je ekshumiran 2016. godine a sahranjen 27. januara 2017. godine.

Danas je obilježen i Dan Mjesne zajednice „Hrasno brdo“.

Informativni bilten Općine Novo Sarajevo

AMBASADORICA REPUBLIKE ČEŠKE U BOSNI I HERCEGOVINI IVANA HLAISOVÁ POSJETILA OPĆINU NOVO SARAJEVO



Ambasadorica Republike Češke u Bosni i Hercegovini Ivana Hlavsová i načelnik Općine Novo Sarajevo dr. Hasan Tanović razgovarali su o zajedničkim aktivnostima i podršci u realizaciji projekata koji omogućavaju razvojnu saradnju.

Ovom prilikom je, između ostalog, istaknuto da je Općina Novo Sarajevo uključena u različite projekte koji se realizuju uz podršku Ambasade Češke Republike, a koji su usmjereni ka upravljanju otpadom, smanjenju energetske siromaštva i drugih. Zajednički prioriteti su zaštita okoliša, reciklaža otpada i smanjenje zagađenja zraka. Fokusi Općine Novo Sarajevo su definisani u okviru Integrirane strategije razvoja Općine Novo Sarajevo do 2023. godine (revidirana za period 2019.-2023. godina)

U tom ključnom strateško-planskom dokumentu Općine za naredni period predviđeno je u sektoru upravljanja otpadom – jačanje infrastrukture za selektivno prikupljanje otpada, kao i u sektoru energetske efikasnosti – smanjenje potrošnje energenata koji imaju negativan uticaj na kvalitet zraka, ali i na druge segmente okoliša primjenom mjera energetske efikasnosti na javnim objektima (školama), individualnim i kolektivnim stambenim objektima.

Općina Novo Sarajevo i Ministarstvo vanjskih poslova Republike Češke ranije su podržali su projekat udruženja „Česka beseda Sarajevo“. U povodu Dana grada Sarajeva, u Parku nacionalnih manjina zasađene su nove sadnice lipe.

POTPISAN UGOVOR O NABAVCI KOMPJUTERA ZA JU „STUDENTSKI CENTAR“ SARAJEVO

Načelnik Općine Novo Sarajevo dr. Hasan Tanović i v. d. direktor JU „Studentski centar“ Sarajevo Toni Vukadin potpisali su Ugovor o finansijskoj podršci za nabavku kompjutera, a s ciljem podrške radu tog centra i stvaranja boljih uslova za boravak studenata.

Danas Centar pruža usluge smještaja i ishrane za oko 2.000 studenata UNSA koji su gotovo podjednako raspoređeni na lokalitetima Bjelave i Nedžarići. Pravo na smještaj i ishranu sa subvencijom u smještajnim kapacitetima JU „Studentski centar“ Sarajevo ostvaruju svi redovni studenti koji imaju mjesto prebivališta izvan Kantona Sarajevo, te strani i vanredni studenti.

Općina Novo Sarajevo nastaviće podržavati ovakve i slične projekte koji za cilj imaju unapređenje obrazovnog sistema, poboljšanja studentskog standarda, kao i druge kvalitetne projekte u skladu sa svojim mogućnostima i nadležnostima.



Informativni bilten Općine Novo Sarajevo

PODRŠKA OPĆINE NOVO SARAJEVO ORGANIZACIJI LJETNE ŠKOLE „SIGURNOST URBANIH SISTEMA“



U organizaciji Fakulteta za kriminalistiku, kriminologiju i sigurnosne studije Univerziteta u Sarajevu u partnerstvu sa Agencijom za zaštitu ljudi i imovine DSC Sarajevo počela je (online) Ljetna škola „Sigurnost urbanih sistema – Tehnički sistemi u zaštiti od požara i privatnoj sigurnosti“.

Tim povodom, polaznicima su se obratili dekan Fakulteta prof. dr. Jasmin Ahić, rektor Univerziteta u Sarajevu prof. dr. Rifat Škrijelj, Branko Vasilj u ime Agencije DSC i načelnik Općine Novo Sarajevo dr. Hasan Tanović.

U svom obraćanju načelnik Tanović je naglasio da Općina Novo Sarajevo kao društveno odgovorna lokalna zajednica posebnu pažnju posvećuje unapređenju stanja u oblasti zaštite i spašavanja.

Podsjetio je da je, prije nekoliko dana, potpisan Memorandum o saradnji između Fakulteta za kriminalistiku, kriminologiju i sigurnosne studije i Općine Novo Sarajevo sa ciljem jačanja kapaciteta i podizanja nivoa prevencije, spremnosti i odgovora Općine u oblasti zaštite i spašavanja. Memorandum o saradnji predstavlja još jedan korak ka unapređenju stanja u oblasti zaštite i spašavanja u ovoj lokalnoj zajednici, a za početak biće uključeno više od 200 studenata ovog fakulteta.

„Čitajući ciljeve i program ovogodišnje Ljetne škole siguran sam da će polaznici i učesnici obuke steći nova saznanja iz oblasti urbanih sistema i sigurnosti, te da će znati kvalitetnije primijeniti svoja stečena znanja u organiziranju i pripremi tehničke zaštite od požara. Struka mora biti prva u svakom procesu pa tako i u oblasti zaštite i spašavanja, zato vam želim sretan rad i uspješno savladavanje svih programskih aktivnosti“, rekao je, u svom obraćanju, načelnik Tanović.

U ovom akademskom programu učestvuje više od 80 učesnika iz Bosne i Hercegovine, Hrvatske, Srbije, Crne Gore i Kosova, kako studenata, tako i profesionalaca. Predavači na ovom programu, pored akademskog osoblja Fakulteta za kriminalistiku, kriminologiju i sigurnosne studije su i profesori ostalih fakulteta Univerziteta u Sarajevu, brojni eksperti i stručnjaci iz prakse, te nadležni kantonalni i federalni inspektori, koji će polaznicima putem online platforme prenijeti svoje znanje i najbolje primjere iz prakse.

Pokretanjem programa cjeloživotnog obrazovanja o sigurnosti urbanih sistema i tehničkih sistema u zaštiti od požara i privatnoj sigurnosti na Fakultetu za kriminalistiku, kriminologiju i sigurnosne studije Univerziteta u Sarajevu želi da stvori uslove za stručnu obuku i obrazovanje u oblasti urbanih sistema i tehničkih sistema u zaštiti o požara i privatnoj sigurnosti. Obrazovanje stručnjaka iz oblasti tehničkih sistema u zaštiti od požara doprinosi razvoju sigurnosti kod šire društvene zajednice, jer je sigurnost jedne države preduslov za njen dalji prosperitet u svim oblastima (ekonomija, privreda, zdravstvo, školstvo).

Ljetna škola održava se od 14.06. do 18.06.2021. godine, u skladu sa epidemiološkim okolnostima.

Informativni bilten Općine Novo Sarajevo

OPĆINA NOVO SARAJEVO OBEZBIJEDILA NAGRADE ZA NAJBOLJE MATURANTE TREĆE GIMNAZIJE



Treća gimnazija Sarajevo u petak, 18. juna ove godine ispratila je još jednu generaciju od 138 maturanata.

Tim povodom u dvorištu škole organizovana je svečana dodjela pohvala, diploma i nagrada najboljim učenicima koji su tokom četiri godine školovanja imali prosjek ocjena 5,00 i bili najbolji ambasadori Treće gimnazije.

Ove godine Općina Novo Sarajevo i Općinski načelnik dr. Hasan Tanović za šesnaest najboljih učenika obezbijedili su prigodne poklone, novčane nagrade za postignute rezultate tokom četverogodišnjeg školovanja.

Direktorica škole Senada Salihović u svom obraćanju zahvalila se Općini Novo Sarajevo i Općinskom načelniku na podršci i što svake godine obezbijedi nagrade za najbolje učenike škole, koji su svojim radom i zalaganjem bili najbolji ambasadori Treće gimnazije i Općine.

Načelnik Tanović u čestitki koju je uputio učenicima poručio je da nastave u budućnosti odlučno koračati ka zacrtanim životnim ciljevima, te da vjeruju i dalje u svoje snove i oni će se ispuniti.



Informativni bilten Općine Novo Sarajevo

U SPORTSKOJ DVORANI „GORAN ČENGIĆ” ODRŽAN 3. SARAJEVO PERFEKT GLORY KUP ALL KARATE STARS



Na 3. SARAJEVO PERFEKT GLORY KUP ALL KARATE STARS učešće je uzelo 610 takmičara iz 56 klubova iz Bosne i Hercegovine, Hrvatske i Crne Gore.

Takmičenje je otvorio načelnik Općine Novo Sarajevo dr. Hasan Tanović koji je svim učesnicima zaželio dobrodošlicu u Općinu Novo Sarajevo i Sportsku dvoranu „Goran Čengić“ i što bolje rezultate.

Na ovom turniru takmičili su se ekipno i pojedinačno pioniri, kadeti, juniori, seniori u KATE (m-ž), kao i pojedinačno pioniri, kadeti, juniori i Open borbe (m-ž) uz pridržavanje predviđenih higijensko-epidemioloških mjera. Najviše predstavnika bilo je iz Karate klubova: „CHAMPION“ sa Ilidže, „SLAVIJA“ iz Istočnog Sarajeva,

„HOLIDAY“ i „SPECIJAL“ iz Goražda.

Organizator turnira je Klub borilačkih sportova „Perfekt“ Sarajevo. Osnovan je 2006. godine, a danas ima više od 2.000 aktivnih članova. Trenutno djeluje u osnovnim školama na sedam lokacija na području Kantona Sarajevo. U dosadašnjem radu osvojili su više od 3.230 medalja na raznim takmičenjima i oko 170 titula najuspješnijeg kluba. Od osnivanja iznjedrili su veliki broj državnih reprezentativaca i majstora karatea – nosilaca crnog pojasa.

U znak zahvalnosti svima onima koji su podržali organizaciju 3. SARAJEVO PERFEKT GLORY KUP ALL KARATE STARS uručene su Plakete. Među njima i načelniku Tanoviću.



Informativni bilten Općine Novo Sarajevo

ZBOG VELIKIH VRUĆINA I SUŠNOG PERIODA IZVRŠENO ZALIJEVANJE SADNICA, DRVEĆA, GRMLJA I CVIJEĆA NA PODRUČJU OPĆINE

Zbog velikih vrućina i sušnog perioda izvršeno je zalijevanje mladih sadnica, drveća, grmlja i cvijeća na više lokacija na području Općine Novo Sarajevo.

Navedene aktivnosti obavljene su na mostovima Hamdije Čemerlića, Topal Osman paše i Malta, kao i kružnim tokovima u ulicama Trg heroja, Azize Šaćirbegović-Južna longitudinala, Pofalići-Put života i Velešići.

Zalijevanjem je bila obuhvaćena i zelena površina oko Sportske dvorane „Goran Čengić“, površine oko spomen obilježja u Hrasnom i Malti, kao i novozasađeno cvijeće oko fontane u ulici Kemala Kapetanovića u blizini Muzičke škole.

U okviru redovnih aktivnosti, pripadnici Vatrogasnog društva Novo Sarajevo 1934 koji su u sastavu općinske Službe civilne zaštite, izvršili su pranje unutrašnjosti pothodnika u Hrasnom brdu.

SVJETSKI DAN ZAŠTITE OKOLIŠA OBILJEŽEN POSJETOM RAVNOJ VALI JEDINOJ PRAŠUMI U KANTONU SARAJEVO

Svjetski dan zaštite okoliša u Kantonu Sarajevo obilježen je u subotu, 5. juna ove godine posjetom Ravnoj Vali, koja se nalazi na području između planina Igmana i Bjelašnice.

Organizator posjete ovoj jedinoj prašumi u sarajevskom kantonu je preduzeće “Sarajevo-šume”, a pored predstavnika ovog preduzeća, ministra privrede Kantona Sarajevo Adnana Delića i predstavnika Šumarskog fakulteta, manifestaciji je prisustvovao i načelnik Općine Novo Sarajevo dr. Hasan Tanović.

Dekan Šumarskog fakulteta prof.dr. Ahmet Lojo u svom obraćanju prisutnima istakao je da je ovdje riječ o jedinstvenom primjeru prašume, netaknute prirode u kojoj čovjek nije imao nikakvu, osim naučnu, intervenciju, te da je u prašumi strogo zabranjena bilo kakva ljudska intervencija kao što je sječa, odvlačenje iz šume starog, palog drveća, branje šumskog bilja i slično., a u slučaju da neko stablo padne pod uticajem snijega i vjetrova ili od starosti, ono ostaje u prašumi.

Ravna Vala je smještena na sjeveroistočnim padinama planine Bjelašnica. Drvna masa te prašume znatno je veća od okolnih šuma, a visina pojedinih stabala je 40 metara. Rasprostranjena je u visinskom intervalu između 1.280 i 1.440 metara nadmorske visine s dominantnom istočnom i jugoistočnom ekspozicijom. U prašumi Ravna Vala, osim drugih divljih životinja, živi i mrki medvjed koji je najveća divlja životinja u Bosni i Hercegovini.



Informativni bilten Općine Novo Sarajevo

U GRADSKOJ VIJEĆNICI UPRIILIČENO OTVARANJE „DANA TUZLE“ U SARAJEVU

U gradskoj Vijećnici u Sarajevu u četvrtak, 17. juna ove godine u organizaciji Turističke zajednice Kantona Sarajevo i Gradska uprava Grada Sarajeva održana je manifestacija u povodu otvaranja „Dana Tuzle“ u Sarajevu.

Gostima i medijima, između ostalih obratili su se gradonačelnica Grada Sarajeva Benjamina gradonačelnik Tuzle Jasmin Imamović, te predstavnici Turističke zajednice Grada Tuzla i Centra za kulturu Tuzla. Svečanoj manifestaciji prisustvovala su brojne zvanice među kojima je i načelnik Općine Novo Sarajevo dr. Hasan Tanović.

Nakon predstavljanja aktivnosti i programa, te prikazivanja promotivnog filma o Tuzli upriličeno je i svečano otvaranje izložbe Ismeta Mujezinovića, te drugih znamenitih slikara (Adela Ber, Haim Pinto, Kristijan Kreković i Đorđe Mihajlović).

Predstava „Kreketanje“ bit će izvedena u 19:30h u Narodnom pozorištu Sarajevo.





Općina Novo Sarajevo

Sarajevo, 01. 07. 2021. godine

73. izdanje



**Bosna i Hercegovina
Federacija BiH
Kanton Sarajevo
Općina Novo Sarajevo**

Izdavač: Općina Novo Sarajevo

tel: +387 33 492 100

Fax: +387 33 644 559

Press: tel: +387 33 492 275/6

Fax: +387 33 492 342

E-mail: novosarajevo@novosarajevo.ba

press@novosarajevo.ba

www.novosarajevo.ba

UREĐIVAČKI TIM: *Mirela Mandal, Elvira Zahiragić, Sunčica Zuban*

FOTOGRAFIJE: *Želimir Kozić*

DTP: *Odsjek za informisanje, odnose s javnošću i protokolarne poslove*